

**Ngwuja'ri ngwanni ngwullu je
Bulij
Timijawuj gi'ra ge'te
Äni kitabanu**

Timijawuj gwuru dikirijin diru damal kundär gani Lijitra, ngwaalu ngwani Layikuniya ken gweneno gicaar Türkiyä. Mbumbu gwüngün gwuru Digirig a be nanni gwüngün ru Diyäwüd (Yiiru 16.1). Timijawuj gwändäär Bulij gwe aar ape yiiru ndi ondaci ngwüjü ngwuja'ri ngwanni ngwujaw ngwani Yicu Kirictu. Timijawuj gwuru nono giiji ndi Bulij ngwuru diiji danni diru ligor le'te pu ndi aar apajidi yiiru.

Ngwuja'ri ngwee ngwüllinä, yilinginna ndi ari Bulij gwugatana Timijawujing Abijuj ndi gataji ngwikirijinä düwä ngenone. Bulij gwondaca Timijawujing ndi ari ngwugirinya ngwüjü ngwe'te ngenone aar dünäji enggacing ngwüjü ngwuja'ri ngwä'tüdi 'didanu (1.3). Ngwinggidu ndi ari lanni liru yi'ra yidi gi'doonga gidi Ngwaalu ladi ru 'taa (3.1-13). Ngwenggaci Timijawujing ndi ari awa a ngwikirijin eelle aar ru gi'du gidi ngwikirijin (3.14-15). Bulij gwülädi Timijawujing ndi ari ngwuru dinäd dijaw didi Yicu Kirictu. Ngwenggaci awa ngwarnga yi'du yidi ngwüji ki'doonga gidi Ngwaalu.

Yajang yidi ngwuja'ri

1. Aganni (1.1-2)

2. Bulij gwondaca Timijawujing gi'doonga ge na lanni liru yi'ra yidi gi'doonga (1.3—3.16)
3. Bulij gwülädi Timijawujing yiiru ye yüngün (4.1—6.21)

¹ Ngwuja'ri ngwee ngwändi 'dünggüny äny gwani Bulij gwuru doo'ra dükäjäär didi Yicu Kirictu yeleny ye yidi Ngwaalu ngwuru Gilang gwege na yidi Yicu Kirictu gwuru ge'taji gwege.

² Ngwükäci nje gijü güny 'didanu ndi ämnä Ngwaalu gani Timijawuj.

Aar ang Ngwaalu ngwuru Papa na Yicu Kirictu gwuru Deleny dege aar ang ätäda yimi'ra aar ang ätäda inäng aar ang ätäda adatingalu.

Arnganar ngwoorta ngwanni ngwuru ngwu'duru

³ Anaku päcä gwälü anni indiny Majiduniya, nunnu nga jalu ngenone kündär gani Abijuj nga girinya ngwüjü ngwe'te ngwä'di aa'ti ba be ngwa ji ndi enggaci ngwüjü ngwuja'ri ngwa'ti indä kayalu. ⁴ Aar dünäji yigo'ro yegen ndi gwuji ondajing gwani lütülütü na ngwuja'ri gwani utiti ngwügürnä ngwüriny ngwanni ngwati 'ti medadu. Ngwuja'ri ngwanni ngwuru gu no, ngwati apa garnating aar 'ti apu yiiru yidi Ngwaalu yanni yati ji ämnä gwe 'dünggüngün.

⁵ Bupi gwudi ngwuja'ri ngwee gwani ämnäjidi gwanni gwati ila giligor lanni liju'ranu na ligor le lanni lijaw na ndi ämnä Ngwaalu gwanni gwuru 'didanu. ⁶ Gilo loko lima je ngwuja'ri ngwee doda lima gwurla ndi ondaji ngwuja'ri ngwanni ngwa'ti äti ngwäyänü. ⁷ Ngwunana

ndi ru ngwoorta ngwudi yobo yidi Ngwaalu, aar 'ti be lingidädi yi'ral yorto ye ngwaalinga yondajaar je na yanni yicinädäär gu mama.

⁸ A lilingidi ndi ari yobo yijaw manari yima ye diji ape yiiru mama. ⁹ Na 'to ar lenge ndi ari yobo ya'ti aar je gi'tija dijü dannididünälü, aar je be gi'tiji ngwüjü ngwanni ngwati kiyi yobo aar nyurtanu, aar je gi'tiji ngwüjü ngwanni ngwa'ti lingidi drü didi Ngwaalu na ngwanni ngwuki, ngwanni ngwa'ti ju'ru aar 'ti indiyobo ye yidi Ngwaalu, ngwanni ngwati 'rinye papang je aar 'rinye nanning je, aar je gi'tiji ngwüjü ngwanni ngwati 'rinyidi. ¹⁰ Yobo yigi'tijäär je ngwüjü ngwanni ngwati mirri ngwäyanü na ngwur ngwanni gwati ape ngwuru. Yigi'tijäär je ngwüjü ngwanni ngwati ummi ngwüjü aar je ellang yinäda, aar je gi'tiji ngwu'duru na ngwüji ngwanni ngwati pi yi'rany 'tur, aar ärriyi'ral 'dar yanni ya'ti aar elatu ngwuja'ri ngwe ngwanni ngwändi kayalu. ¹¹ Yanni ya'ti aar indiygwu'ri ngwe ngwanni ngwujaw ngwanni ngwünäjinä ngwudi Ngwaalu ngwätädäär nje Ngwaalu ngwanni ngwortana.

Bulij gwinädi Delenya

¹² Nggwati ci Delenya dege dani Yicu Kirictu yäy 'tu gwanni gwuminy ätä yiima gwänggädiny ndi ari äny gwuru ligor le'te pu, aar nyige'te giyiru yüngün. ¹³ 'Di manari gwele äny gwüllüdi Ngwaalinga nyi übinigwüjälü ngwüngün nyi 're ngwäy. Gwänädiny ndi ari nggwuru de'rr nyi 'ti äti ämning Ngwaalu. ¹⁴ Yimi'rü yidi Deleny dege yibäljäär nje nono yirälü, ämni

gwe Ngwaalu na änni gwe gwanni gwuju ndi Yicu Kirictu.

¹⁵ Ngwuja'ri ngwee ngene ngwäti ngwäyänü, ngwädi gu ndi ar je änni 'dar, Yicu Kirictu gwindi ngene gididlä ndi gilängidiyi ngwüjü gwanni ngwuki, nono änying gwanni gwukana 'denggen. ¹⁶ Nyi be inädä Ngwaalinga gwanni gwukana nono nunnu a Yicu Kirictu inggidi määtäng ligor lüngün lanni la'ti rimitalu nyi ru gora gidi ngwüjü gwanni ngwa änni nginde gwe aar mbuji miding gwudi gwur'taling. ¹⁷ A denya ru na näji ru gwudi Deleny didi gwur'taling, danni dati midi gwur'tal, danni dati 'ti enggana, danni diru Ngwaalu ngwe'te pu pupud. Yiru gu.

A Bulij ola Timijawujing

¹⁸ Giji güny gani Timijawuj, nggwätädängä ngwuja'ri ngwee anaku aru gu yijir gwani nga gwerre, nunnu ma je gwujani, nga gwa ape yongra yanni yijaw, ¹⁹ nga mätinälü ndi änni Ngwaalu a ligor le lijaw. Loko lanni lima obe ngwuja'ri ngwee gora ge, lima geraji ämningälü Ngwaalu gwegen nono ma dudu ape bälükä ngwugerajalu. ²⁰ Gilo ganu lani Iminiyuj na Älijikändär lanni liminje ätä dijego'ro ngwuje reraji aa'ti la lo Ngwaalinga.

2

Otaci Ngwaalingalu

¹ Nyi be bupi gwerre gwerre ndi ari, a bupi ji ngaa otaci Ngwaalingalu ngaa je olenga ngwüji

ngaa je ci yäy 'tu gwani ngwüjji 'dar, ² gwani ngweleny, gwani ngwüjji 'dar ngwanni ngwümäti yelenya, nунnu ar jalu 'dar ladatalu ar eelle elelleng gwanni gwüjilänü gidrü 'dar didi Ngwaalu na ndi ju'ri 'dar. ³ Giyee yijaw aar jada Ngwaalinganu ngwuru Gilang gwege, ⁴ ngwanni ngwüminä ngwüjü 'dar aar mbuji gilanging aar lenge bebereng gwudi 'didanung. ⁵ Ndi ari Ngwaalu ngwuru ngwe'te pu a dantan gidiliganu ndi gwä'räjidi ngwüjü Ngwaalinga le ru de'te pu diji dani Yicu Kirictu. ⁶ Gwanni gwümü'rinä nono ligo'ro lüngün gwani ü'rälü gwudi ngwüjji 'dar. Inggidi nggwee gwuru ngwanni gwuma Ngwaalu ge'te ngwuji kaji güngün. ⁷ Yiru giyee yanni yigäbica Ngwaalinga aar nyi be ge'te nyi ru diji durnidu ngwuja'ri ngwe ngwujaw nyi ru doo'ra dükäjäär. Nggwondaja 'didanu nggwa'ti ondaja yi'duru nyi ru doorta didi ngwuja'ri ngwudi änni Ngwaalu na 'didanu gwani ngwüjji ngwuru Garany.

⁸ Äny gwubupa a ngwur ngwaalu 'dar alliji ngwuyala ngwuju'ru aar otaci Ngwaalingalu yigor ye ya'ti äti güündänü aar 'ti äti garnatinganu. ⁹ Nyi bupi 'to a ngwaw genne ngwureda ngwädi je aar ja'rimani nono denya gwe na yaaru. Aa'ti ngwarri yayu micini gwe ngwä'rü aar genne dab aar genne yi'rigara yi'ri aar genne ngwureda ngwanni ngwu'ri, ¹⁰ aar be manni arri yayu ape gwe yiuru yanni yijaw yanni yädi ngwaw ngwanni ngwaru ngwäpijä Ngwaalinga yobo. ¹¹ A daw gwugwundi aar enggaci ngwulenge 'dengenaja ku. ¹² Äny gwa'ti gwa änni ndi

daw enggaci duru ya ndi ape yelenya gidurala, ngwube manni gwugwundi. ¹³ Ndi ari Adam gwuru gwuge'taar gwerre gwerre aar be ge'ta Awang. ¹⁴ Na Adam gwä'tüdi gwanni gwidäjäär, a be daw ru didäjäär ngwuru dannu dinyurtanu. ¹⁵ A be ngwaw ngwa gilingidini linge gwe yiju manari ngwuma gwuji ämning Ngwaalu gwegen, aar ämni ngwüju aar ju'ri aar gu ü'ru.

3

Ngwangida

¹ Ngwuja'ri ngwee ngene ngwädi gu, ma diji dere ligor le lüngün mini ndi ru dangida didi gi'doonga gidi Ngwaalu, yi'ral giyee yijaw. ² Yibüpinä nding ru dangida dijaw nono, didi daw de'te pu, ngwubebere, ngwümäätä ligo'ro lüngün, ngwuru diji dinyädäär, ngwuru diji didi yirnu, ngwäti yiima ndi enggaci ngwüju. ³ Aa'ti da iyä di'rica ngwürläli, aa'ti da ru däärä, aa'ti da kadi jadanu, ngwube manni ru diji dijilänü, dadataralu ngwüji ngwe, aa'ti dübiji ngwü'rinyänü. ⁴ Ngwulenge ruying ngwüju ngwüngün gidrü mama, ngwengga ndi ari gwu'dengenaca yiju yüngün aar denya denyang gwanni gwindi kayalu. ⁵ Ndi ari manari diji dima 'ti lingidi ruying ngwüju ngwüngün gidrü, awa ngwube burni ndi ombaji gi'donga gidi Ngwaalu? ⁶ Aa'ti da ru diji dämna Ngwaalu girem nunnu aa'ti da piyi ligo'ro lüngün da aar de obalu obalu gwe gwanni gwübädäär gwe dijego'ralu. ⁷ Aa'ti ngwüriiny ngwüngün ngwa ke ngwüju ngwäy poor ki'doonga ngwikirijin

nunnu aa'ti gwa i'di giyi'ralanu yidi yaaru ngwi'däti ngwü'dibänü ngwudi dijego'rr.

Lanni lati gendaji guy giyiiru

⁸ Yiru gu ye'te ye'te 'to ndi ari lanni lati gendaji guy giyiiru, aar ru ngwüji ngwädi gu nda je ngwüji denya, aa'ti ngwa ru yigoranu rom, aa'ti ngwa iyi di'rica aar rläli, aar ru ngwüji ngwübija ngwü'rinyänü gwudi yu'ram. ⁹ Aar ru ngwüji ngwürimiti ngwuja'ri ngwanni ngwuru 'didanu ngwudi änni Ngwaalu ligor le lijaw nono. ¹⁰ Aar je idäji gwerre gwerre aar je be ge'te ndi gendaji guy giyiiru manari la'ti ke nono gwere giyi'ral yere. ¹¹ Yiru gu ye'te ye'te ngwaw aar ru ngwaw ngwädi gu nda je ngwüji denya, aa'ti ngwa ru ngwaw ngwänjü ngwüjü nono, aar be bebera aar ru yigor ye'te pu giyi'ral 'dar.

¹² Gwanni gwati gendaji guy giyiiru, ngwuru dur didi daw de'te pu ngwurriyi yijü na ngwu'duna ngwüngün mama. ¹³ Lanni lima gendaji guy giyiiru mama, aar je ätä gu'ru gipa na ndi ännici gwanni gwubinga ndi änni ndi Yicu Kirictu gwegen.

Yujimid yidi änni Ngwaalu gwege

¹⁴ Anni ge'tajiny ndi ila 'danggalu gomon ga'ti olanu, nggwüllijängä ngwuja'ri ngwee nunnu, ¹⁵ manari nggwuma jana, nga lenge awa ndi enggaci ngwüjü aar rurriyi yigo'ro yegen ngwu'dun ngwudi Ngwaalu ngwanni ngwuru gi'doonga gidi Ngwaalu ngwumidu, ngwuru ngwobo aar ru yidingo yidi 'didanung. ¹⁶ Yanni yolanu ndi utalu, yujimid yidi drü didi Ngwaalu yojema ndi ari,

Kirictu gwuru dji dümnä,
 a gwe Ligi'rim inggidi,
 a yi'rr engga,
 aar gwe ondaji ngwüjänü ngwuru Garany,
 a gwe ngwüji änni gididlä,
 aar 'di'riyi ngwallu kerala gwünäjinä.

4

Arngana ngworta ngwuru ngwu'duru

¹ Ligi'rim londaju gilingenalu ndi ari ngwüdlä ngwänü ngwudi gwodaning, ngwüji ngwoko ngwo're kay ndi änni Ngwaalu ngwa gwuji ngwü'rillä ngwanni ngwuru ngwu'duru ngwa gwuji enggacing gwudi ngwujego'rr. ² Enggaci gwanni gwindi gu no, gwudi ngwumur'tuny gwuru gwuru gwudi ngwu'duru, yigor yegen yima ru yidingol nono ma aar ü'dini ligä le. ³ Ngwati etaci ngwüjü ndi agu aar je girinya ngwong ngwudi eny ngwanni ngwuge'ta je Ngwaalu nda je ngwüji eny ngwanni ngwämnä Ngwaalu aar je lenge yanni yiru 'didanu aar gu caji Ngwaalinga yäy 'tu. ⁴ Ndi ari 'dar yanni yege'ta je Ngwaalu yijaw, yere ya'ti ya 'dünyini ma aar äpini ci gwe Ngwaalinga yäy 'tu, ⁵ ndi ari yigä'rinä ngwuja'ri ngwe ngwudi Ngwaalu aar gä'rini otaci gwe Ngwaalingalu.

Rüdi dinäd dijaw didi Yicu Kirictu

⁶ Ma ang enggaci ngwengga yi'ral giyee, nga gwa ru dinäd dijaw didi Yicu Kirictu, di'rüniyäär ngwuja'ri ngwuru 'didanu ngwudi änni Ngwaalu na ngwudi enggaci ngwanni ngwujaw

ngwanni ngwuma ang gwuji. ⁷ Aa'ti ngaa laca-jidi ngwüji ngwe ngwuja'ri ngwä'tüdi lütülütü gwudi drü didi Ngwaalu ngwube ru lütülütü gwati ngwaw ngwuru ngwümäyîn ondaji. Nga be manni iditäni ligo'ro lunga gidrü didi Ngwaalu. ⁸ Ndi ari iditäni gwudi ngwangina gwuru gu'ru, a be iditäni gidrü didi Ngwaalu gwurana gu'ru ngwuja'ri 'dar, gwani midi gwenene na midi nggwä'di. ⁹ Ngwuja'ri ngwee ngwäti ngwäyänü na ngwädi gu ndi aar je änni 'dar ¹⁰ yiru giyee yäpädär gu yiuru ar gu unda ngwäy, ndi ari ge'taji gwege gwüjädä Ngwaalu ngwanni ngwumidu, ngwanni ngwuru Gilang gwudi ngwüji 'dar gwece gwece ngindenga lanni lämnä Ngwaalu.

¹¹ Ülädi ngwüjü nga je enggaci yi'ral giyee. ¹² Aa'ti gäbikä dijü dere ndi aar ang calu mireny nunnu nga gwuru damal, nga be ru gora gijaw gidi ngwikirijîn ngwuja'ri, ndi eelle, ndi änni, ndi änni Ngwaalu, na ndi ju'ri. ¹³ Ge'ta ligo'ro lunga ndi gwuji ülijing ngwüjü ngwuja'ri ngwudi Ngwaalu, ndi ondaci ngwüjü nga je enggaci, 'di nyi ila. ¹⁴ Aa'ti a gwa i'dädänü angidaji gwe gwunga gwanni gwangidacaranga ngwuja'ri ngwe ngwudi yijir anni ma aar ang mbumbunga lidi gi'doonga alliji ngwuy nono.

¹⁵ Gwuja yi'ral giyee nga je ärrä, nga je gu gatada ligo'ro lunga ku, nunnu aar engga ndi ari nga nggwo gwindädi gweere. ¹⁶ Arngana ligo'ro lunga na ngwuja'ri ngwändi kayalu mama. Ündädi gu ngwäy, ndi ari ma gu ru, nga gwa gilängidiyi ligo'ro lunga na ngwüji ngwanni

ngwati ang 'dingini.

5

Ärrji ngwïkirjïnä

¹ Aa'ti a gwa girinya dïmäyïnä diru dur dulu de, nga be ärrï nono mbumbung gwunga. Lanni liru ngwamal ärrä je nono ngwanggalu, ² na ngwaw ngwuru ngwämäyïn, ärrä je nono nanning je, na ngwaw ngwanni ngwü'di'rälü, ärrä je nono ngwanggalu yi'ral ye 'dar yanni yiju'ru.

Ngwedel

³ Arngaca ngwedela mama ngwanni ngwuru ngwedel 'didanu ngwa'ti äti ngwüjänü. ⁴ A be dedel danni däti yijü, ngwäti ngwügürnä ngwuru yiji, yiiru yegen gwerre gwerre, aar eelle yiiru ye yidi yobo, aar arngani ngwüjü ngwegen gidrü no ya gwä'räci mbumbung je na nanning je na ngwügüürnä ngwegen dämjä giyigo'ro yegen, giyee yati jada Ngwaalinganu. ⁵ Dedel danni diru diwayi 'didanu, digätinänälü jücü, ngwätädä Ngwaalinga ge'tajing gwüngün ngwugwuji ngwuja'ri ngwani otaci Ngwaalingalu dilu de na lingen le nunnu a Ngwaalu gataji düwä. ⁶ A be dedel danni digwuja ami'ra gwudi lingen, dayu giligi'rïm eelle gwüngün gwuru 'tur. ⁷ Ondaca ngwüjü ngwuja'ri ngwee, nunnu 'to, aa'ti gwere gwa ji gwa yi'ral i'dä nono. ⁸ A be diji danni dati 'ti monaca ngwüjü ngwüngün, gwece gwece gwani ngwüji ngwüngün gidrü, gwuma gatu ämning Ngwaalu mbüny gwuma kani gidiji da'ti ämnä Ngwaalu.

9 Dedel danni da aar ülläji ngwüriny gidil-lucu didi ngwedel ngwanni ngwati je gi'doonga gataji düwä, ngwuru danni däti ngwüdläyü ngwü'tänälü 'di nyärläl (60). Ngwuru danni diruca duru düngün ligor le'te pu gwele gwerre,* 10 ngwulinginni ndi ari dapu yi'ral yanni yijaw, ndi ari di'rüniyä yijü yi'ral yijaw, dijaw yirnü, dülläjä ngwüjälü ngwudi Ngwaalu 'dunu 'dünggüngün ngwuyi ngwüjü yora nono ngwudi Ngwaalu. Digataja ngwüjü düwä ngwanni ngwuju gidirbänü, ngwü'di'ri yiiru ye 'dar yanni yijaw.

11 A gwani ngwedel ngwanni ngwü'di'rälü, aa'ti ngwa je ülläji gidillucu ndee. Ndi ari ma ji ma je ami'ra gwegen gwudi lingeni dami ge'tajing gwegen ndi Kirictu, ngwa bupi ndi ägini. 12 No la obalu yigo'ro ye yegen, ndi ari lima kiyi ngwuja'ranu ngwanni ngwaraar ngwe gwerre. 13 Ya ji giyee gay ge'te, la äbräji ndi ru ngwujagi'ral la rcalu lir lir ngwu'dunanu. La'ti la ru ngwujagi'ral 'dogo, la be gwurla 'to ndi äniiji ngwüjü nono aar äni giyi'ralanu yä'tüdi yegen, aar ädini ndi ondaji ngwuja'ri ngwä'tüdi ngwadi aar ngwe ari. 14 Yäy no, nggwa ola ngwedela ngwanni ngwü'di'rälü aar ägini, aar linge, aar ruyi ngwu'duna ngwegen, aa'ti la gi'tiji güwänü gubu'ru ndi aar nje ngwüji ondajaji yi'ral nono yere. 15 Yiru gu ndi ari ngwedel ngwanni ngwü'di'rälü, ngwoko ngwo ngwuma 'tü kay poor 'didanu ngwuma gwuji dijego'ro.

* 5:9 5.9 Däginä gwele gidur de'te pu. 5:10 5.10 Yuwana 13.1-17; Täküwän 18.4

¹⁶ Dikiriñin danni diru daw dāti ngwedela gidrü, ngwuje iye aa'ti ngwungwe 'rigädi gi'donga gidi Ngwaalu, nunnu a gi'doonga burni ndi ombaji ngwedela ngwanni ngwa'ti äti ngwüjänü.

Mbumbunga lidi Yi'doonga

¹⁷ Mbumbunga lanni lati ombaji yi'ral yidi gi'doonga gidi Ngwaalu mama, lädi gu ndi aar je gendacani gu'ru, gwece gwece lanni lati ape yiiru ndi ondaji aar enggaci ngwüjü. ¹⁸ Ndi ari gitab gidi Ngwaalu garu nu, "Aa'ti a gwa gekaci gindri ngwüjirti ngwulem ndi eny ma ge ji ndi u'ri yona," na ndi ari, "Gwanni gwati ape yiiru, gwati aar ätä gu'ru güngün." ¹⁹ Aa'ti a gwa ämni ngwuja'ri ngwäbingädäär je mbumbung nono, nga je be ämni 'dogo manari ngwüji ngwuma ji rom (2) gwalla tä'rül (3) ngwanni ngwänggädi je. ²⁰ Lanni lati ape gwuki, girinyädi je ngwäyänü ngwüji, nunnu a yedeny eny ngwüjü aar arngani.

²¹ Nggwa ang olada ngwäyänü Ngwaalu na ndi Yicu Kirictu na yi'rr yanni yäbräär je, ndi rime ngwuja'ri ngwee aa'ti ngwa ang ngwe uti ngwüjänü, aa'ti ngwa ang ngwe ämnäni ngwüjü ngwoko.

²² Aa'ti nga büdädi ndi alliji ngwüjü ngwuy nono ndi ape yiiru, aa'ti a gwa acidi ndi ke gwudi ngwüji ngwu'ter. Arngana ligo'ro lunga nga ju'ri.

²³ Gäbicä iying yaw yümnä 'dogo, ati ang be drü di'rica dooko gwani lari lunga lanni lati ang enyanu na dümdü danni dati ang määtä pid pid.

24 Ke gwudi ngwüjï ngwoko nggwo gwulinginna, gwati je madina gweere aar enggani gwerre gwerre gomon ga'tina gidi obalu. Na ke gwudi ngwüjï ngwoko gwati ji ngwube 'täälü gwodan. 25 Yiru gu ye'te ye'te 'to no ndi ari, yi'ral yanni yijaw yilinginna 'di 'to yanni yati 'ti engganalu no, ya'ti ya änälü ya 'tädinälü gilingenalu.

6

Ngwinäd

1 Ngwinäd ngwanni ngwuru ngwïkirïjin, aar engga ngworta ngwegen ndi ari ngwädi gu ndi aar je denya nunnu aa'ti ngwüriiny ngwudi Ngwaalu na inggidi gwege gwa aar lo. 2 Ngwinäd ngwudi ngwoorta ngwuru ngwïkirïjin, aa'ti ngwa aar ngwe anidanu ndi ari liru yengga. Aar je be manni äpïjänï yiuru, ndi ari lanni lärrijäär je yiuru, liru ngwïkirïjin aar je jayi ngwäy.

Enggaci gwanni gwïndï kayalu

Yi'ral yiru giyee yanni ya je enggaci ngwüjü nga je ye päcälü.

3 Gwere gwanni gwati inggidi ngwuja'ri ngwa'ti aar ïndï ngwuja'ri ngwe ngwudi Deleny dege dani Yicu Kirictu ngwanni ngwuru 'didanu, aar ru yobo yidi drü didi Ngwaalu, 4 dïringinä ligo'ro lüngün 'dого da'ti lingïdi yi'ral yere. Dümädi ligor ndi garnati, a kajidi danu ngwuja'ri ngwanni gwati apa yi'dünyü aar apa yajidinganu, luding na üpinäjïdi ngwuja'ri ngwanni gwuki, 5 na kajidi ngwäy gwanni gwati 'ti medadu. Yi'ral yiru giyee yidi ya rany yegen yiki,

ngwuma je ngwuja'ri doda ngwanni ngwuru 'didanu a ngwati engga ndi ari drü didi Ngwaalu, gay giru gidi bile.

⁶ 'Didanu ndi ari drü didi Ngwaalu mung aw dijü ngwäy, dati gäbici dijü ngwünänü gwulleny.

⁷ A la'ti apana gony gere gindär ge gididlä ndee, na ga'ti ga ar apani gere gididlä ga ar ge ele.

⁸ Ma be ari a limbuju enying ar äti ngwureda, aar nje be aw ngwäy. ⁹ A be ngwüjü ngwanni ngwüminä ndi nänü, ngwati aar je idäji aar i'däti giyi'ralanu yonyadu yidi ye'rr na ami'ra gwanni gwuki gwati dudiyi ngwüjü aar geradalu. ¹⁰ Ndi ari änni gwudi ngwü'riny gwuru gay gati ge yi'ral yanni yiki badalu 'dar. Na ngwüji ngwoko, ndi ari ngwati änni ngwü'rinyä, ngwuma je gay doda gidi änni Ngwaalu, ngwuma düginä yigo'ro yegen yi'rendeny ye yonyadu.

Bulij gwülädi Timijawujing

¹¹ A be nga gwani Timijawuj, anni rang gwudi Ngwaalu, 'tüdä giyi'ralanu giyee 'dar, gwuja dünngälü, nga gwuji drü didi Ngwaalu, nga äti ämning Ngwaalu nga gwuji ämning, nga äti or'temajing nga jilänü. ¹² Apa yiiru yongra yijaw yidi änni Ngwaalu. Mätinälü ndi midi gwudi gwur'taling gwanni gwornacaranga gwanni gwuma gwe inggidi ngwuja'ri ngwunga ngwanni ngwujaw ngwäyänü ngwüji ngwonyadu ngwanni ngwänggädängä.

¹³ Ngwäyänü Ngwaalu, ngwanni ngwati midiyi yi'ral 'dar na ndi Yicu Kirictu, gwanni gwüdünü ngwäyänü gideleny dani Bilatij Bündi ngwinggidi inggiding gwanni gwujaw, nggwa ang ge'te

ndi ari ¹⁴ nga rime ngwuja'ri ngwee gwujaw nono 'di a Deleny dege dani Yicu Kirictu 'täädälü. ¹⁵ Ngwaalu gwadi 'täjä Yicungalu kaji güngün. A Ngwaalu ürtädini ngwanni ngwuru Deleny jücü, Deleny didi ngwelenyinga na Doorta didi ngwoortanga, ¹⁶ Nginde jücü gwanni gwumidu gwati ji giburi gwati aar 'ti 'donggaca, gwa'ti diji änggädi na gwa'ti gwa aar engga. A denya gwüngün ru na yiima yüngün ru yidi gwur'taling. Yiru gu.

¹⁷ Üladi ngwüjü ngwünänü ngene gididlä ndee ndi ari aa'ti ngwa piyi yigo'ro yegen aar gatada lingina ndi nänü gwegen gwuru 'tur, aar be manni gatada lingina Ngwaalu ngwanni ngwünänü ngwati nje monaci yi'ral ye 'dar ar ye jayanu. ¹⁸ Üladi je ndi ari aar ärrä yi'ral yanni yijaw, aar nänü yi'ral ye yanni yijaw aar jayi yirnü yanni yätäär je aar je ge'te ngwüjü ngwu'ter. ¹⁹ Gay ge nggee, la be aa yu'rina yidi yigo'ro yegen ya ru nono yidingo yojema yidi oda gwani ngwüdlä ngwä'di ngwudi gwodaning, nunnu aji aar midi miding gwanni gwuru 'didanu.

²⁰ Gwani Timijawuj, arngana yiiru yanni yima ara je ätäädä. Abru ngwuja'ri ngwanni ngwä'tüdi drü didi Ngwaalu nga abri garnating gwudi ye'rr gwanni gwucaar bebere gwuru yi'duru. ²¹ Loko gilo lanni laru läti bebereng nggwee gwuru yi'duru, lima je gay doda gidi änni Ngwaalu. Ara je gu yimi'rü ji.

Laro Bible (Bible)
Laro NT

copyright © 2020 Wycliffe Bible Translators, Inc.

Language: (Laro)

Contributor: ECS Diocese of Khartoum Translation Department

This text box needs to have content for PT9 to upload is to the DBL.
All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

80c639f7-4569-5ffa-a77d-5df4c223631f